



Broj: 04-05-4-2476/18  
Sarajevo, 20.12.2018. godine

SAOPĆENJE ZA JAVNOST O OBJAVLJENOM IZVJEŠTAJU REVIZIJE UČINKA  
„PRAĆENJE REALIZACIJE PREPORUKA IZ IZVJEŠTAJA REVIZIJE UČINKA:  
PODRŠKA RAZVOJU MALOG I SREDNJEG PREDUZETNIŠTVA U FBiH“

Ured za reviziju institucija u Federaciji Bosne i Hercegovine proveo je praćenje aktivnosti institucija na realizaciji preporuka iz Izvještaja revizije učinka „Podrška razvoju malog i srednjeg preduzetništva u FBiH“, objavljenog 2013. godine. Cilj praćenja bio je ispitati da li su odgovorne institucije preduzimale aktivnosti na osnovu predmetnog izvještaja, s obzirom na značajnost malog i srednjeg preduzetništva za razvoj privrede i zapošljavanje u Federaciji BiH.

Praćenjem je konstatovano kako većina preporuka iz predmetnog izvještaja revizije učinka nije realizovana ni nakon nekoliko godina od objave izvještaja. Od **ukupno sedam preporuka** koje su date u predmetnom izvještaju, **jedna preporuka je u potpunosti realizovana, četiri preporuke su realizovane djelimično, dok za dvije preporuke nisu preduzimane aktivnosti na njihovoj realizaciji.**

Na osnovu provedenog praćenja, zaključeno je da **Vlada FBiH i Federalno ministarstvo razvoja, preduzetništva i obrta još uvijek nisu preduzeli odgovarajuće aktivnosti neophodne za razvoj sektora malog i srednjeg preduzetništva.** Prilikom provođenja programa podrške razvoju ovog sektora, prioritet se i dalje davao dodjeli finansijskih poticaja, dok su izostale opšte mjere podrške koje su potrebne za stvaranje boljih uslova poslovanja za sve subjekte malog i srednjeg poduzetništva. Riječ je o mjerama usmjerenim na otklanjanje uzroka nestimulativnog poslovnog okruženja poput komplikovanih administrativnih procedura, dugog trajanja i visokih troškova pokretanja poslovanja, kao i velikog poreznog opterećenja i mnogobrojnih parafiskalnih nameta. Revizija je zaključila da i dalje nedostaju kvalitetne ulazne informacije potrebne za kreiranje svrsishodne podrške ovom sektoru.

U prethodnim godinama učinjen je određeni napredak u definisanju kriterija za odabir korisnika finansijskih poticaja, međutim konstatovano je da kvalitet projekta i dalje ne predstavlja kriterij koji se koristi za ocjenu projekata u svim oblastima za koje su poticaji davani. U konačnici, utvrđeno je da Federalno ministarstvo razvoja, preduzetništva i obrta nije osiguralo odgovarajuće praćenje rezultata poticaja kako bi se utvrdio stvarni učinak datih poticaja na razvoj ovog važnog sektora.

Rezultati praćenja su također pokazali da nije ostvaren napredak u postupanju Parlamenta FBiH i Vlade FBiH na osnovu izvještaja revizije učinka, jer ih isti nisu redovno razmatrali, niti su svojim zaključcima obavezali institucije da realiziraju date preporuke.

Uvažavajući ekonomski potencijal i značaj sektora malog i srednjeg preduzetništva za privredni razvoj FBiH, **Ured za reviziju cijeni da nadležne institucije trebaju preduzeti dodatne aktivnosti kako bi se, u cilju efikasnije podrške ovom sektoru, realizirale preporuke date u izvještaju „Podrška razvoju malog i srednjeg preduzetništva u FBiH“.** **Potrebno je posebnu pažnju posvetiti praćenju učinka datih poticaja, kako bi se osigurali odgovarajući efekti od finansijskih sredstava koja se izdvajaju iz Budžeta FBiH za ove namjene.**

Kompletan izvještaj revizije učinka dostupan je na web stranici Ureda za reviziju: [www.vrifbih.ba](http://www.vrifbih.ba).



GENERALNI REVIZOR  
Dževad Nekić, dipl. oec.